

14 Feb. 2025 .18:15 Hrs

Headlines

- प्रधानमंत्री नरेंद्र मोदी होरें आखेआ ऐ जे भारत ते अमरीका आतंकवाद खलाफ लड़ाई च पूरी तगड़ेयाई कन्नै किट्टे खड़ोते देन।
- उपराश्ट्रपति जगदीप धनखड़ होर श्री माता वैष्णो देवी युनिवर्सिटी दे 10में दीक्षांत समारोह च शामिल होने लेई कल जम्मू औडन्न।
- समूलचा राष्ट्र अज्ज पुलवामा हमले दे शहीदें गी चेत्ता करा'रदा ऐ। प्रधानमंत्री नरेंद्र मोदी, गृह मंत्री अमित शाह ते एल.जी मनोज सिन्हा होरें शहीदें गी श्रद्धांजलि अर्पित कीती ऐ।
- 11एं दिनें तोड़ी चलने आहला दिव्य कला मेला अज्जै थमां जम्मू च शुरू-एल.जी मनोज सिन्हा होरें आखेआ जे नरेंद्र मोदी सरकार दिव्यांग लोकें दे सशक्तिकरण लेई कम्म करै करदी ऐ।
- केंद्र सरकारै बिजली सरबन्धी ढांचे लेई जम्मू-कश्मीर गी 5 ज्हार करोड़ रपे अलॉट कीते न।

<><><><><><>

PM US President

प्रधानमंत्री नरेन्द्र मोदी होरें गलाया ऐ जे भारत ते अमरीका नै 2030 बरें तगर दपक्खी बपार गी दुगना करी 500 अरब डॉलर करने दा फैसला कीता ऐ। उनें अज्ज वाशिंग्टन डीसी च व्हाइट हाउस च अमरीकी राश्ट्रपति डोनाल्ड ट्रंप हुंदे कन्नै दपक्खी वार्ता मगरा संयुक्त संवाददाता सम्मेलन दरान एह गल्ल आक्खी। मोदी होरें आखेआ जे भारत ते अमरीका रणनीतिक साझेदारी गी अगगे बधाना जारी रक्खडन। मोदी होरें आखेआ जे भारत दी रक्षा तैआरिएं च अमरीका महत्वपूर्ण भूमका नभांदा ऐ। प्रधानमंत्री मोदी होरें आखेआ जे भारत ते अमरीका आतंकवाद खलाफ लड़ाई च मजबूती कन्नै खड़ोते देन ते इस गल्ला पर सैह्यत न जे बन्ने पारा आतंकवाद गी खत्म करने आस्तै ठोस कार्रवाई करने दी लोड़ ऐ। उनें आखेआ

<><><><><><>

Add

अमरीकी राष्ट्रपति डोनाल्ड ट्रम्प होरें आखेआ जे भारत ते अमरीका जेडे दुनिया दे सब्बनें शा पराने ते बड्डे लोकतंत्र देश न, बश्कार इक विशेष रिश्ता ऐ। उनें दस्सेआ जे भारत ते अमरीका नै उर्जा दे बारे च इक महत्वपूर्ण समझौता कीता ऐ जेड़ा इस गल्लै गी यकीनी बनाग जे अमरीका, भारत गी तेल ते कुदरती गैस उपलब्ध करोआने आहला प्रमुख मुलख बने।

<><><><><><>

VP-Jammu Visit

उपराश्ट्रपति जगदीप धनखड़ होर इक दिनै दे दौरे लेई कल जम्मू आवा'रदे न जिस दौरान ओहू कटड़ा च श्री माता वैष्णो देवी यूनिवर्सिटी दे 10में दीक्षांत समारोह दे मुख्ब परौहने दे तौर पर अध्यक्षता करंगन। आकाशवाणी दे जम्मू संवाददाता दी जानकारी मूजब उपराश्ट्रपति हुंदा रियासी जिले च त्रिकुटा पहाड़ियें पर स्थित श्री माता वैष्णो देवी दी गुा ते भैरो मंदर जाइयै मत्था टेकने दा बी कार्यक्रम ऐ। उआं उपराश्ट्रपति जगदीप धनखड़ हुंदा एहू दौरा पैहले पिछले बरे 27 दिसंबर गी होना हा, पर साबका प्रधानमंत्री मनमोहन सिंह हुंदा काल होई जाने पर केंद्र सरकार आसेआ घोषित कीते गेदे राजकीय शोक कारण इस दौरे गी अगड़ा पाई दित्ता गेआ हा।

<><><><><><>

Pulwama Attack

अज्ज पुलवामा हमले दी बरसी ऐ। अज्जै दे ध्याड़े गै ब'रे 2019 च इक आतंकवादी हमलावर नै सीआरपीएफ दे काफिले पर विस्फोटके कन्नै भरोची दी गड्डी गी जाई मारेया हा जिस करी 40 कर्मी शहीद होई गे हे ते केई सारे जखमी होए हे। प्रधानमंत्री नरेन्द्र मोदी होरें इस हमले दी बरसी पर शहीदें गी श्रद्धांजलि भेंट अर्पित कीती ऐ। अपनी सोशल मीडिया पोस्ट च मोदी होरें आखेआ जे औने आलियां पीढ़ियां, शहीदें दे बलिदान ते राष्ट्र प्रति उंदे अनन्युट्ट समर्पण गी कदें बी नेई भुल्लडन। गृहमंत्री अमित शाह होरें बी शहीदें गी श्रद्धांजलि भेंट कीती ते आखेआ

जे आतंकवाद, मनुक्खता दा सब्बने थमां बड्डा दुश्मन ऐ। उपराज्यपाल मनोज सिन्हा होरें बी इ'नें दलेर शहीदें गी श्रद्धांजलि अर्पित कीती। उनें अपने सनेहू च आखेआ जे उंदा बलिदान पीढ़िएं गी प्रेरित करदा रौहगा।

<><><><><><>

Doda Tiranga Rally

तोआई, डोडा जिले च इक गैर सरकारी संगठन नै सुरक्षाबलें कन्नै रलियै पुलवामा हमले दी 6मीं बरसी दे मौके पर इक श्रद्धांजलि कार्यक्रम दा आयोजन कीता। श्रद्धांजलि दे हिस्से दे तौर पर डोडा डाक बंगले थमां इक्क तिरंगा रैली कड्डी गेई जेदे च पुरुष ते महिलाएं बड़ी बद्द गिनतरी च हिस्सा लैता। एहू रैली शैहरै थमां लंग्घी जेदे च लोकें देशभक्ति दे नारे लाए। इस दौरान सुरक्षाकर्मी, समाजी कार्यकर्ता ते मकामी लोकें इस कार्यक्रम च शामिल होइयै शहीद जवानें दे बलिदान गी चेत्ता कीता ते राष्ट्रीय एकता ते शांति लेई अपनी प्रतिबद्धता गी फही पक्का कीता। इस दौरान एनजीओ आसेआ रैली गी आयोजित करने आहले आयोजक नै आखेआ।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 ब'रें दे बश्कार ऐ ते ओहू कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उप्पर 15 फरवरी 2025 थवां पैहले-पैहले आइए दस्ती जमा करोआनी होगा। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

Divya Kala Mela (byte)

जम्मू च अज्जै थमां दिव्य कला मेला शुरू होई गेआ ऐ। इस मेले च देश भरै दे हुनरमंद दिव्यांग कारीगर ते उद्यमी अपनी प्रतिभा दा प्रदर्शन करै करदे ना। समाजी न्याऽ ते सशक्तिकरण मंत्री डॉ. विरेंद्र कुमार ते उपराज्यपाल मनोज सिन्हा होरें इस मेले दे उद्घाटनी समारोह च हिस्सा लैता। दिव्यांगजनें गी सशक्त बनाने आहले मैहकमे पास्सेआ आयोजित एहू मेला 24 फरवरी तोड़ी हर रोज बडुलै 10 बजे थमां लेइयै रातीं 9 बजे तक लगा करोग। मेले च दस्तकारी, हथखड़ी, घरें दी सजावट आहले समेयान, पर्यावरण दे अनुकूल उत्पाद, गैहने-बंदे ते होर केई चीजें गी 20 राज्यें ते केन्द्र शासित प्रदेशें थमां आए दे 100 शा मते कारीगर पेश करै करदे ना। इस मौके अपने संबोधन च एल.जी होरें आखेआ जे प्रधानमंत्री नरेंद्र मोदी हुंदी अगुवाई आहली केंद्र सरकारै दिव्यांग लोकें दी भलाई बेहतरी आस्तै केई गैई पुट्टियां ना। उनें आखेआ।

<><><><><><>

JK-Power Infra

जम्मू-कश्मीर च बिजली सरबन्धी बुनियादी ढांचे गी मजबूत करने लेई केंद्र सरकार आसेआ बक्ख-बक्ख केंद्र प्रायोजित योजनाएं तैहत 5 ज्हार करोड़ रपे शा मती रकम दित्ती गेई ऐ। आकाशवाणी दे जम्मू संवाददाता दी जानकारी मूजब जम्मू-कश्मीर च बिजली सरबन्धी बुनियादी ढांचे गी मजबूत करने लेई 5 ज्हार 835 करोड़ रपे दी रकम दित्ती गेई ऐ। एहू जानकारी लोकसभा च इक आधिकारिक जवाब च दित्ती गेई जेदे च प्रदेश गी सरकारी पैहलकदमियें राहें दित्ती गेदी माली मदाद बारै दस्सेआ दसाया गेआ। इस राशि दा इस्तेमाल बक्ख-बक्ख योजनाएं लेई कीता जा'रदा ऐ जेदे च नमें सिरेआ तैयार कीती गेदी वितरण खेत्तर योजना यानि (RDSS) स्कीम बी शामिल ऐ जेदा मकसद बिजली दे नुकसान गी घट्ट करना ते बिजली दी बंड च सुधार आहनना ऐ।

<><><><><><>

JK Toll Tax

पिच्छले 5एं ब'रें दरान केन्द्र शासित प्रदेश जम्मू-कश्मीर च टोल-टैक्स राजस्व दी गुराई च बड़ा मता बाद्दा दर्ज कीता गेआ ऐ। लोकसभा च पेश कीते गेदे आंकड़ें मूजब, ब'रे 2019-20 च जित्थे एहू राजस्व 130 करोड़ 7 लक्ख

रपे हा उत्थे गै 2023-24 च एहू बधियै 436 करोड़ 86 लक्ख रपे होई गेआ। आकाशवाणी दे जम्मू संवाददाता दी रिपोर्ट मूजब, 2023-24 दुरान होरनें राज्यें जि'आं उत्तर प्रदेश च एहू राजस्व 6 ज्हार 695 करोड़ 40 लक्ख रपे ते राजस्थान च 5 ज्हार 5 सौ नुंजा करोड़ 48 लक्ख रपे हा। इस्सै चाल्ली साढे गोआंडी राज्य पंजाब च इस अवधि दुरान एहू राजस्व 1 ज्हार 491 करोड़ 94 लक्ख रपे हा जेहड़ा जम्मू-कश्मीर दे राजस्व थमां त्रै गुणा शा बी मता ऐ।

<><><><><><>

JK Jal Shakti

जम्मू-कश्मीर च 80 फीसद ग्रामीण परोआरें गी नलकें राएं पीने आहले पानी दे कनैक्शन उपलब्ध करोआए गे न। जल शक्ति मैहकमे दे केन्द्री मंत्री सी.आर.पाटिल होरें लोकसभा च दस्सेआ जे अगस्त 2019 च जल जीवन मिशन दी शुरूआत मगरा पीने दे नलके आहले कनैक्शनें च 80 इशारिया 8-7 फीसद दा बाद्धा होआ ऐ। उ'नें दस्सेआ जे उस बेल्लै 5 लक्ख 75 ज्हार परोआरें गी नलकें राएं पीने आला पानी उपलब्ध हा ते हुन 15 लक्ख 55 ज्हार परोआरें गी एहू सुविधा हासल होआ करदी ऐ। मंत्री होरें जानकारी दिती जे 'जल शक्ति अभियान: कैच द रेन अभियान' दी अमलावरी दा मकसद बरखा दे पानी दा संरक्षण करना, उसी किट्टा करना ऐ ते एहदे राएं जिमीं हेठ पानी दे स्तरै गी बधाना ऐ ते एहदे च महिलाएं दी खास भूमका गी मंत्री होरें उजागर कीता। इस मिशन दी 2024-25 ब'रे आहली समें-सीमा खत्म होने च हून किश गै म्हीने रेई गेदे न ते जम्मू कश्मीर इस लक्ष्य गी 100 फीसद हासल करने दी दिशा च तेजिआ कन्नै कम्म करा'रदा ऐ।

<><><><><><>

Watershed Yatra – Ramban (byte)

रामबन जिले दे उखराल इलाके च कल वॉटरशेड यात्रा अभियान 2025 दी शुरूआत कीती गेई। इस यात्रा दा सरिस्ता प्रधानमंत्री कृषि सिंचाई योजना 2.0 दे तैहत कीता गेआ ऐ ते रामबन च इस अभियान दी शुरूआत उत्थुं दे डिप्टी कमीशनर बसीर-उल-हक चौधरी हुंदे मार्गदर्शन हेठ कीती गेई। यात्रा दा उद्घाटन डीडीसी अध्यक्ष रामबन डॉ. शमशाद शान ते रामबन दे विधायक अर्जुन सिंह राजू होरें कीता। इस अभियान दुरान बरखा दे पानी

गी बचाने, रूक्ख-बूहटें लाने ते सामुदायिक भागीदारी गी बढ़ावा देने पर जोर दित्ता जाह्ग। इस अभियान दे राएं उखराल च 3 ज्हार 300 कमांहू जिमीं गी इस चाल्ली कन्नै तैयार कीता जाह्ग तां जे उत्थें पर्यावरण दा संतुलन जकीनी बनाने दे कन्नो-कन्नी पानी गी बी बचाया जाई सकै। इस मौके उप्पर अपने विचार सांझे करदे होई डीडीसी अध्यक्ष शमशाद शान होरें आखेआ

<><><><><><>